



# Mussavia per dumondas sin il champ da la promozion da la lingua e cultura rumantscha ordaifer la Svizra rumantscha

## 1. Context

Dapi l'onn 2021 promova la Confederaziun la lingua e cultura rumantscha ordaifer il territori linguistic rumantsch (diaspora rumantscha). Per questa promozion èn 400'000 francs per onn disponibels. Ad uffants e giuvenils duain star a disposizion purschidas da furmaziun rumantschas er en la diaspora e persunas e famiglias emigradas duain vegnir sostegnidias en il diever da lur lingua. Per pudair consolidar, emprender e far diever da la lingua duain vegnir elavuradas e promovidias las basas correspondentas. Ultra dal sustegn direct d'uffants e giuvenils duai pia era vegnir possibilà al conturn dals uffants e giuvenils da duvrar la lingua en il mintgadi. La noziun *diaspora rumantscha* sa refrescha en spezial a la diaspora extrachantunala, ma er al territori betg tradiziunalmain rumantsch en il chantun Grischun. Il sustegn da projects sa funda sin l'Ordinaziun davart las linguas naziunalas e la chapientscha tranter las cuminanzas linguisticas (Ordinaziun da linguas, OLing).

## 2. Secturs da promozion

L'Uffizi federal da cultura (UFC) po sustegnair ils suandants projects:

### 2.1. Emprerender e consolidar la lingua rumantscha per uffants e giuvenils

- projects per sviluppar purschidas da furmaziun per uffants e giuvenils da tut las classas da vegliadetgna ordaifer il territori linguistic rumantsch, en spezial ordaifer il chantun Grischun, e cun caracter da pilot;
- projects per elavurar meds d'instruczion e purschidas da furmaziun (en furma tradiziunala e/u virtuala) per uffants e giuvenils da tut las classas da vegliadetgna ordaifer il territori linguistic rumantsch;
- projects che faciliteschan ad uffants e giuvenils da famiglias rumantschas che vivan ordaifer il territori linguistic rumantsch ed en spezial ordaifer il chantun Grischun l'access a la lingua e cultura cun agid da segiurns e barats en il territori linguistic tradiziunal.

### 2.2. Diever da la lingua rumantscha

- projects che faciliteschan l'access a la lingua rumantscha e contribueschan al diever ed a la consolidaziun da la lingua; quai èn per exemplu purschidas digitalas (dad open source) che pussibiliteschan l'access al stgazi da pleuds, la grammatica, l'ortografia, la correctura linguistica ed a translaziuns automaticas;
- projects che pussibiliteschan al conturn d'uffants e giuvenils ordaifer il territori linguistic da far diever da la lingua; per exemplu cun animar las famiglias dals uffants e giuvenils da far diever da la lingua u cun famigliarisar la part dals geniturs betg rumantscha cun la lingua.

### **3. Premissas e criteris da promozion**

#### *3.1. Premissas da promozion*

Ils projects ston u esser d'interess surordinà u avair in caracter da model. *Interess surordinà* signifitga ch'ils projects sa drizzan a l'entira diaspora rumantscha. *Caracter da model* han ils projects, sch'els èn exemplarics ed innovatifs per la promozion dal rumantsch en la diaspora e sch'els èn er appligabels per autras regiuns, gruppas en mira u acturas ed acturs. Las contribuziuns a projects mettan en il focus il svilup, la creaziun e l'iniziazion da projects. Contribuziuns periodicas per purschidas a lung temp (dapli che 3 onns) èn previsas be en cas excepcionalis. En il sectur digital vegnan promovids sulettamain projects en connex cun formats, datas e purschidas avertas (dad open source) e che n'en betg orientads ad in gudogn. Las dumondas da project en il sectur digital ston declarar explicitamain, quant enavant che persunas ordaifer il territori linguistic profitescan dal project. Ils projects ston esser finanziads commensuradamaain.

#### *3.2. Persunas autorisadas da far ina dumonda*

Instituziuns, organisaziuns, communitads sco er interpresas pon inoltrar dumondas per in sostegn finanzial. Dumondas per in sostegn finanzial per purschidas da tgira e da furmaziun en relazion cun structuras regularas (p.ex. purschidas da canorta, instrucziun da lingua facultativa en la scola obligatorica u postobligatorica) ston vegnir sustegnidas da las autoritads chantunalas e communalas cumpentantas. Cun l'inoltraziun da la dumonda sto vegnir consegnada ina brev da sostegn correspundenta.

Per purschidas da furmaziun che vegnan realisadas en il chantun Grischun, ma ordaifer il territori linguistic tradiziunal ston vegnir inoltradas dumondas ensemble cun il departament d'educaziun chantunal. En quel cas sto vegnir cumprovà ch'il chantun Grischun e la vischnanca da domicil sa participeschan finanzialmain al project e quant grond che lur sostegn finanzial è.

#### *3.3. Criteris per l'examinaziun da las dumondas*

L'UFC examinescha las dumondas a basa dals suandants criteris:

- a. qualitat dal cuntegn e qualitat specifica;
- b. gruppa en mira definida claramain ed integraciun da la gruppa en mira;
- c. relevanza dal project per la gruppa en mira da la (1) diaspora extrachantunala e/u da la (2) diaspora a l'intern dal chantun;
- d. durabladad e persistenza dals projects;
- e. contacts e cooperaziuns cun partenaris en il sectur respectiv.

I vegn dà prioritad a las dumondas che adempleschan il meglier ils criteris en la consideraziun cumplexiva.

La finanziaziun dals projects duai avair ina basa uschè vasta sco pussaivel. L'agid finanzial da l'UFC importa max. 70% dals custs budgetads e sin il pli 100'000 francs per project ed onn. Lavur voluntara po vegnir resguardada sco atgna contribuziun cun max. 10% dals custs totals. La lavur voluntara sto vegnir preschentada en il plan da finanziaziun sin la vart da las expensas e la vart da las entradas.

#### *3.4. Projects betg sustegnid*

Translaziuns (per exemplu da paginas-web e cudeschs) u ovras litteraras/artisticas na pon betg vegnir sustegnidas. Projects ch'en cuverts tras auters secturs da promozion da la Confederaziun na vegnan betg sustegnid u sustegnid mo subsidiarmain. Projects u intents orientads ad in gudogn na vegnan betg sustegnid.

## **4. Infurmaziuns praticas**

### *4.1. Documentaziun*

Las dumondas ston veginr inoltradas sin la plattaforma da promozion da l'UFC. Las suandardas parts ston veginr includidas per pudair giuditgar in project:

- descripzion detagliada dal project (finamiras, activitads planisadas ed avantatg dal project per la promozion da la lingua e/u la cultura rumantscha en il sectur correspondent);
- plan da finanziazion detaglià incl. budget che preschenta la part dal sustegn da l'UFC e d'autras funtaunas da finanziazion;
- planisazion da termins cun las etappas ed ils terms impurtants previs;
- structura da l'organisaziun dal project (team, organisaziun, partenadis, etc.);
- tar lavurs u mandats externs sco part dal project: offertas da las firmas correspondentes, davent d'ina summa da mandat da varga 20'000 francs almain duas offertas da differentas firmas;
- ev. brev da sustegn tenor cif. 3.2.

### *4.2. Infurmaziuns generalas*

- Las dumondas pon veginr inoltradas **cuntinuadomain**. A partir da l'onn 2025 n'exista nagin termin fix.
- Davart il pajament d'agids finanzials decida l'UFC. Per la valitaziun professiunala po el consultar expertas ed experts.
- Schebain ed en tge dimensiun ch'in project vegin sustegni finanzialmain decida l'UFC sulettomain sin basa da la documentaziun inoltrada. L'UFC na fa naginas retschertgas supplementaras e na maina nagins discurs.
- Las dumondas ston cumprovar che las premissas da sustegn èn ademplidas e cuntegnair tut las indicaziuns necessarias concernent ils criteris da sustegn.
- Cun la decisiun positiva u negativa da l'UFC pon ins quintar var dus mais suenter l'inoltraziun.

### *4.3. Persuna da contact tar l'UFC*

Per ulteriuras infurmaziuns As drizzai a signur Clau Dermont, secziun Cultura e societad ([clau.dermont@bak.admin.ch](mailto:clau.dermont@bak.admin.ch); tel. 058 / 467 39 97).

Stadi: december 2024